

QUÆSTIO MEDICA,

*Quodlibetariis disputationibus manè discutienda in Scholis
Medicorum, die Jovis 31. Decembris 1711.*

M. CAROLO THUILLIER, Doctore
Medico, Præsede.

An Medicina quò simplicior, eò melior?

I.

EST O, post tot animorum motus, post tanta sermonum opinionumque certamina, cedant & quiescant λόγον μεμνηντάι; victi dent manus *Humoristæ*; fracta jaceant qualitatum facultatumque agmina, veteris Medicinæ robur; absistat vel ipsa dux optima Natura, imò, si fors tulit, funditùs concidat suis nihil pollens opibus: Fermenta, Archeos, Sulfura, Sales aliaque omnia hujuscemodi igniferæ gentis subsidia, triumphet victrix fluidorum solidorumque potentia: Horum ergò regimine stabit deinceps aut ruet valetudo, animalis œconomix complementum? Vel hoc quis non credat qui illa viventis corporis primordia esse noverit: hoc enim quaecunque ex fluidis primò genitum, ex adnatis unâ solidis formatur & firmatur, ex conjunctis utrorumque viribus ac in æquo consociatis vivit & valet; secùs verò, huic quantumvis naturâ & usu valido, quæ mala non incidunt? quæ huic, perversâ semel aut exutâ solidorum fluidorumque æquabilitate, non incurrunt instantis adversæ valetudinis signa? quæ non subeunt morborum genera, feralis plerumque exitii prænuncia? ni præclara medendi disciplina, salutis humanæ sospitatrix erudita, illud aut sapienter depellat, aut prudenter antevertat.

II.

ET ne quid externi deforet adjumenti, tam secundæ quam adversæ valetudini, multis antè nos sæculis *in tres partes Medicina diducta est, ut una esset quæ victu, altera quæ medicamentis, tertia quæ manu mederetur*; his singulis pro diversâ temporum locorumque consuetudine, sui fuere professores, instituta, leges, præcepta ac instrumenta; sed, ita me Dii ament, quò major iisdem singulis suberit simplicitas ac facilitas, eò major tutiorque futura est

earum vis ac potestas, itemque eò certior firmiorque consequetur per eas quæ sita valetudo, hæc autem qualiscunque tota pender tum ex æquabili mutuoque fluidorum solidorumque pressu, tum ex liquoribus perenniter & liberè fluentibus per longè latèque diffusam tubulorum vasorumve congeriem. Nihil equidem, quod sciam, tanto operi aptius accommodatiusque putandum est, quàm illud quod simplici viâ facilique modo liquida solidaque inter se se conciliando, eorum symmetriam, crasim & indolem tuetur, instaurat ac redintegrat: hæc omnia præstat quam quid maximè clarissima Medicinæ pars quam *διαιτητική* Græci nominaverunt: hæc enim suis, quantum potest, interclusa finibus, Balneo videlicet & Abstinentiâ nimios fluidorum solidorumque nifus lenit & emollit: Frictione ac Sudore, lentos commoveret & extimulat: Gestatione & omnis corporis Excitatione, torpentes & languidos concurit & suscitatur: his omnino similibusque rebus fit ut simplex victus ratio non ægros modò, sed sanos quoque sustineat.

III.

IN nuce Iliadem, in pagellâ, inquam, hîc tenes omnia medicamenta, *sine quibus ad sanitatem pervenire non possunt multa admodum quæ corporibus nostris incidere consueverunt*: quid ista, sodes, intempestivè obtrudis? ignoras, scilicet, ut insignes olim arte & facundiâ viri, *horum æsum ex magnâ parte non sine causâ sustulere?* Ecquid te fugit? ut illorum æmuli Medici Parisienses suis magnis & divinis bonis eam assecuti sunt licentiam, quâ post longum sæculorum ambitum, veterum ruderâ, Empiricorum farragines, Arabum fæces ac quisquilias exigerent, quâ demùm universam *φαρμακευτικήν* alterum Augiæ stabulum, Herculeo labore repurgatam, suo nitore de integro redderent: bona verba, quæso, non rectè accipis? his audacter utere medicamentis quæ valent dispartes adeò fluidorum solidorumque vires æquare ac servare, æstus coercere, fluorem tardare, lentitudinem accelerare, vitia denique quælibet emendare: si ab eventu facta putes notanda, medicamenta sive simplicia, sive mixta opitulantur, illa autem ut potè æternæ & immutabilis naturæ opus, meliora; hæc verò, fragilis duntaxat fluxæque artis molimina, deteriora; utraque tamen, plurima fuere ad fingendum credendumque materies. Quid verbis opus est? in tantâ copiâ rerum valetudo, seu nostra omnis vis quæ in animo & corpore sita est, faciliùs semper & tutiùs retinebitur ac restituetur iis artibus, quibus initio parata est: ex simplicibus quidem mollioribusque succis, vi genitali adfusa, formatus

compactusque homo, vivit in utero, crescit in cunis lacte ciborum simplicissimo nutriendus, donec adolescat, valentioris materiæ indigus. optima itaque medicina, simplex cibus opportunè datus, quidni & optima Medicina lene & simplex medicamentum?

I V.

VENIO nunc ad *χειρουργικὴν* vetustissimam Medicinæ partem quæ initio rerum exulta, ab Heroibus Diisque ipsis agitari cœpit; his, sive veris, sive fabulosis aucta, ingens sibi nomen fecit: hæc, oppidò, simplicissima, ne novos solidis fluidisque obices perperam figeret, *sine peregrinis & conquisitis & compositis medicamentis curare novit vulnera, sive ista fecerit Medicus, sive acceperit*: hæc pariter tota ferè in actione solâ posita, non à latentium rerum conjecturis, sed ab exploratis manuum effectibus, evidentique innumerabilium curationum profectu, suas maximè traxit medendi vias: quanta quanta est Chirurgia, totum sanè illud suum decus, non minùs singulari suæ simplicitati debet, quàm impavidæ artificis menti, intrepidæ secandi urendique industriæ, immisericordi beneficentiæ, intremiscenti stabilique manuum dexteritati, pertinaciæ denique vagitibus inexorabili: fallor ego qui ista probem? facinus profectò fœdum! ululantis fœminæ ubera igne ferroque rescindere, expirantis hominis præcordia latrocinate scalpello perfodere, faucium angustias interclusasque spiritus vias armatâ manu perumpere: fœda hæc quidem & terrentia; verùm, utilitatis necessitatisque causâ inventa est salutaris nostra professio; non potest vehementi malo, nisi æquè vehemens auxilium succurrere; omnis honesta & recta ratio est expediendæ salutis, dubiaque spes desperatione potior; Quin & indulgendum ægris, qui pro insitâ sibi vivendi cupidine, quæ vel ipsis sapientibus novissima exiit, inter innumerabilia tormenta, in ipsaque trucidatione, fugienti vitæ moras quarere non desinunt. ad summam, ne agam de singulis Chirurgiæ generibus, nulli penè non morbo succurrit simplicissima expeditissimaque sanguinis per venas detractio; hujus si quidem præsentiope, liquidis solidisque suis commodè redditur servaturque tenor, & utrisque sic amicè conjurantibus, facilè & paulo sumptu stat reditque amabilis valetudo.

V.

ET quod ad rem maximè pertinet, clamitant pleræque omnes sapientum disciplina, *naturâ duce errari nullo modo potest; omnia quæ secundum naturam sunt, sunt habenda in bonis; repugnante naturâ*

Medicina non proficit; ut natura, Medicina erit; clamitant cum Hippocrate Medicorum filii, ὅσων φύσις ἰατροί; ἡ γὰρ μιν φύσις μὲν ἀνθρώπων ἡ φύσις; si quid autem est natura, si quis illi hic locus, si datur hic hujus nominis usus, nihil certè illà simplicius, qualis qualis illa sit, nihil perfectius fingi excogitarive potest: hæc igitur potior habebitur Medicina quæ modicis indiga medicamentis, ad naturæ simplicitatem proximè accesserit. At gravibus, inquires, Medicis & magna plerumque professis, & placuit multiplex Medicina, & licuit audere quidlibet & miscere?

Scimus, & hanc veniam dabimus, petimusque vicissim,

Sed non ut placidis coeant immitia, non ut

Serpentes avibus gementur, Tigribus agni.

Quid quæris? artium scientiarumque summa laus ac perfectio ducitur à singulari cujusque simplicitate; ut cæteras taceam, circumspice, quæso, quæ maria non intravit Navigatio levi duntaxat circumducta pixide? quos cæli meatus non descripsit radio Astronomia? Quos eadem syderum orbis, fragili non percurrit vitro? quæ rerum miracula non effinxit penicillo Pictura? quæ alimenta sanis corporibus non promittit rudis Agricultura? quas vires igitur quamve sanitatem ægris non promittet simplex & εὐπελὴς Medicina: atque hæc quidem hæctenus, ita ut vero proxima sequatur illa conclusio.

Ergò Medicina quò simplicior, eò melior.

Domini Doctores disputaturi.

M. Ægidius Adam.

M. Joannes Nicolaus de la Hire
à Regiâ scientiarum
Academia.

M. Renatus le Conte.

M. Camillus Falconet Medici
Regius ordinarius.

M. Antonius Geoffroy.

M. Franciscus Afforty Aca-
demia Censor.

M. Hyacinthus Theodorus
Baron.

M. Joanne Franciscus Con-
thier.

M. Germanus Pécoux Pro-
fessor Regius.

Proponebat Parisiis ELIAS COL DE VILARS Rupifor-
caldensis, Baccalaureus Medicus. A. R. S. H. 1711.

Apud Viduam Francisci Muguet, Regis & Facultatis Medicinæ Typog.